

Bisdóm Willemstad

Julianaplein 5 • Curaçao, Dutch Caribbean -Tel (599-9) 462-5876
Fax (599-9) 462-7437 - E-mail: bisdómwstad@gmail.com

MENSAHE DI KUARESMA 2017

Fe i Speransa firme den tempu difísil i insigur.

Rumannan tur den Kristu,

Nos mundu, i esaki ta konta pa nos seis islanan tambe, ta pasando den un temporada ku por laga nos sinti nos mes inrankil i hasta disgustá di loke nos ta lesa i tende.

P'esei aworakí, ku nos ta pará dilanti di e temporada di Kuaresma, ta nesesario pa usa e oportunitat aki pa nos tuma na serio e susesonan ku ta tuma lugá den nos bida, den nos famia i den nos komunidad.

Komo disipelnan di Hesukristu i miembronan di Iglesia nos ta yamá pa diserní, iluminá pa e Palabra di Dios i orashon, kua ta e direkshon ku Señor ta mustra nos pa vense e insiguridat i inrankilidat ku nos ta bibando i traha huntu pa pas duradero.

Mi ta ofresé tres rekomendashon:

E promé rekomendashon: nos desishon i direkshon mester ta unu fundá riba fe i speransa firme den Dios, manera nos por lesa den salmo 46: "Dios ta nos refugio i fortaleza, un yudadó den tempu di angustia... Señor di universo, E ta ku nos, Dios di Yakob ta un fòrti pa nos" (*Sal* 41,1).

Papa Benedikto XVI a bisa ku dilanti di tantu situashonnan negativo, ku hende ta pasando awendia, apesar di e progreso tékniko i ekonómiko, "hende tin mester di Dios, si no e ta keda sin speransa"... Hende no por keda salbá pa medio di siensia, ma pa medio di amor... Speransa den sentido kristian, ta semper un speransa aktivo, pa yuda otro, pa lucha pa nos mundu bira un tiki mas luminoso i humano (*Spe salvi* cf. 25-26).

E di dos rekomendashon ta pa nos hasi bon uso di e temporada aki di Kuaresma. E ta un tempu di grasia pa rekonosé e sombran ku ta opskuresé nos bida, e parti debil i kibrá di nos realidat humano, e inkonsistensia, falsedat, hipokresia den nos manera di komportá, pa laga e lus di Kristu iluminá nos kondukta i aseptá di nobo Dios su amor misericórdioso ku por kura nos kompletamente.

Den e Mensahe di Kuaresma pa e aña aki Papa Francisco ta rekordá nos ku "Kuaresma ta e tempu favorabel pa profundisá nos bida spiritual pa medio di *orashon*, *ayuno* i *limosna*". Tumando for di e palabra di San Pablo, e ta spierta nos riba e piká ku ta hasi nos siegu, e piká aki ta "amor pa plaka ku ta rais di tur sorto di maldat". (*1Tm* 6,10) Papa ta sigui bisa: "Esaki ta e kousa mayor di korupshon i fuente di envidia, pleitu i yalusí. Plaka por dominá nos, te na e punto di bira un ídolo tirániko (cf. *Evangelii gaudium*, 55). Na lugá di ta un instrumento pa nos hasi bon (*hacer el bien*) i ehersé solidaridat pa ku otro, plaka por someté nos, i henter mundu, segun un lógika egoista ku no ta laga espasio pa amor i ta stroba di biba na pas".

Pero si nos habri nos kurason pa e presensia di Dios, nos ta risibí e forsa pa biba e

sentido real di miseri kòrdia i yuda otronan ku nos kontribushon pa aliviá esnan ku ta sufri di pobresa.

E di tres rekomendashon ta bai tokante un palabra ku nos a skucha ora nos a risibí shinishi riba nos frenta: **“Kombertí i kere den Evangelio”**. Kombershon personal, kombershon familiar i kombershon komo komunidad.

Nos mester ta riba un kambio pa forma un komunidad mas sano i mas ekilibrá. Mi ta keda enfatisá riba esaki: ku nos mester kibra definitivamente ku inseguridat i intrankilidat, mas ainda, kibra ku deshonestidat, manipulashon di hende, falta di rèspèt pa otro ku ta bai kontra dignidat di hende, violensia verbal i físiko, tur esaki ta pikánan ku ta debilitá nos komunidad te den su rais.

Aki mi ta invitá tur hende di bon boluntat pa resa pa nos lidernan polítiko, empresarial, sosial i religioso, pa nan por tin e sabiduria, integridat i kurashi pa para pa e bèrdat i pa e balornan fundamental di nos komunidadnan.

Siguiendo ku e tradishon di Iglesia i ku nos a rebibá durante e Aña di Hubileo di Miseri kòrdia, mi ta invitá boso pa praktiká e obranan di miseri kòrdia korporal i spiritual. Nos por hasié na un manera individual i komunitario.

Komo signo komunitario di solidaridat i akshon di Kuaresma, mi ta sugerí pa den kada parokia i den nos skolnan, un komishon parokial, siguiendo bou di guia di e pastor, pa pone su mes disponibel pa lanta “Caritas”, ku ta e instansia internashonal di Iglesia katóliko pa promové hustisia sosial i organisá aktividatnan na fabor di hende den nesesidat.

Lo tin un poster disponibel i un karta ku lo splika ku mas detaye tokante “Caritas” i e akshon di e Kuaresma aki.

Rumannan, mi ta rekordá ku den Hesus nos ta rekonosé e kara miseri kòrdioso di Dios Tata. Su palabra i su bida ta un lus briante ku ta sende den nos mente i kurason e speransa i konfiansa firme ku E ta ku nos kada momentu di nos historia, pa vense tur opstákulo. Awor E ta pidi di nos banda pa nos ta dispuesto pa uni i koperá kun'E pa medio di akshonnan konkreto i positivo.

Nos ta invoká protekshon di Mama Maria, pa e kompañá nos durante e tempu di Kuaresma aki, pa nos praktiká e rekomendashonnan aki, i pa nos por kosechá frutanan di obranan Miseri kòrdia ku nos ta bai presentá riba e fiesta di Pasku di Resurekshon di su Yu Hesuskristu.

Boso sirbidó den Hesus i Maria,

+ Luis A. Secco, SDB
Obispu di Willemstad